

Tgi era Pius XI?

In apostel da pasch e fraternitad tranter umans

DA GUIU SOBIELA-CAANITZ

■ Amez mars 1937 han mess episcopals surdà persunalmain il text tudestg, anc confidencial, d'in'enciclica a mintga augsegner da Germania. L'uvestg ordinava da uppentar il document enfin al 21, la dumengia da palmas, e d'al preleger lez di durant la messa. Blers spirituels han mess en salv il messadi papal en il tabernachel da lur baselgia parochiala. Uschia han ins derasà e publitgà l'opinun motivada dal papa davart la dictatura che regeva la Germania dapi quatter onns. L'enciclica condemnava «l'idolatria» da la razza, il pievel u il stadi e «l'emprova vana da serrar Dieu, il creatur da l'univers (...) en ils cunfins d'in sulet pievel». Papa Achille Ratti (1857–1939) aveva emprendi d'enconuscher il naziunalisem sia sco spiritual, cur che papa Benedetg XV (1854–1922) l'aveva delegà en Pologna e Silesia, lura, davent da 1922, sco Pius XI, durant la crisa europea da 1923 e cunzunt tras l'Italia faschista. El s'infurmava davart la Germania grazia a sia enconuschienscha profunda dal linguatg tudestg, emprendi 1874–1875, al seminari da Monza/Lumbardia, cun ses consolar Josef Kellenberger da Son Gagl; sco spiritual a Milaun a la fin dal 19avel tschientaner ha Ratti surpiglià t. a. la pastoraziun dals pitschens spazzachamins tirolais en la metropola lumbarda. Las leschas talianas da 1938 encunter ils gideus han stimulà il papa, strusch tschintg mais avant sia mort, da relevat publicamain ch'in cristian na possia tuttina betg esser in antisemit. Tut quai pon ins leger en la nova biografia elavurada d'Yves Chiron, istoricher dal catolicissem, sin la basa da retschertgas en ils archivs dal Vatican e dal ministeri franzos da l'exterior e da viadis en Pologna e Lituania sin ils fastisz da quel ch'era anc mo nunzi (1). I vala la paina da s'occupar cun quel papa oz emblidà.

Avert areguard il giudaism

L'autur ha già scrit biografias d'umens dal 19avel e 20avel tschientaner, t. a. Pius IX (1792–1878) e Pius X (1835–1914). Era tar Pius XI releva Chiron nodas conservativas en la lingia dals dus Pius surmenziunads, per exempl pia opposiziun senza compromiss a l'ecumenism sco che nus al chapin oz. Ma quest papa lumbard dat en egl cun sia avertadad profetica areguard il giudaism. Il domini austriac aveva facilità l'integrazion dals gideus milanais en la societat da la citad. «1907 è Ratti vegnì magister d'ebraic al seminari da spirituels da Milaun. Da lur ennà hal's entupà dapli cun il rabin suprem da la citad (...). Ratti gieva savens a la sinagoga cun ses scolars per tadlar rabin Da Fano, (...) sa familiarizar cun l'ebraic discurrì ed entrar en contact direct cun la religiun giudaica» (p. 68).

En Pologna e Lettonia

La famigliaritat da Ratti cun il tudestg e sia avertadad han stimulà Benedetg XV, en mars 1918, d'al numnar visitader apostolic a Warszawa per restaurar la vita catolica en la Pologna, anc occupada da Germania; 1919 è'l schizunt vegnì nunzi. «En la Galizia da l'ost cumbativen Polacs ed Ucrainas per dominar la citad da Lwów/Lviva, nua che la maioritat da la populaziun era polaca» (p. 89); ma la Russia communista ha conquistà la part la pli gronda da l'Ucraina e surlaschà lezza citad 1921 a la Pologna. 1920 è il nunzi à Wilno/Vilnius, «citad controllada dals Polacs, ma che la Lituania pretendeva sco sia anteriura chapitala» (p. 93). En mars hal'fatg ina visita en Lettonia per gidar la minoritat catolica (1 milliun olmas) da la giuvna republika a schliar ses nundumbraivels problems. Per turnar en Pologna hal'stù «traversar il flum Daugava sin ina bartga tranter massas da glatsch» (p. 94). La disputa tranter Pologna e Germania pervi da la



Silesia auta è stà il crap da stgarpsch da Ratti. En avrigl l'ha Benedetg XV numnà cumissari da la baselgia per la votaziun d'autodeterminaziun en la regiun; ma in conflict da cumpetenza cun l'archuvestg tudestg da Silesia ha impedit Ratti d'agir cun efficazia.

Reconciliar ils pievels da l'Europa

Gia 1923 ha Pius XI vilentà la Frantscha naziunalista cun ina critica a l'occupaziun militara da la regiun da la Ruhr. Cun quella occasiun hal'fatg endament la luciditat dal chancelier Otto von Bismarck-Schönhausen (1815–1898) suenter la victoria militara prussiana da 1866: «Per dar la pasch al mund, vesa mo in'allianza tranter Franzos, Beltgs e Tudestgs. Ils inimis d'ina giada duain far amicizia. L'act politic il pli grondius da Bismarck è stà ch'el n'ha betg opprimì l'Austria suenter Königgrätz, perquai ch'el la leva per pli tard sco aliada da Prussia; [cun quella intenzion e] mo cun l'agid dal prinzi ereditari hal'resistì al retg ed als generals ch'insistivan per conquistar Vienna» (cità p. 285). 1926 e 1927 ha Pius XI declarà pliras giadas che la doctrina religiosa da la partida naziunalista extrema «Action française» (AF) saja incumprible cun il cristianism. Ils manaders da l'AF han replitgà critigond vehementamain l'acziun dal Vatican per reconciliar ils pievels da l'Europa; in d'els ha schizunt stigmatizà quai ch'el numnava «l'encletg flaivel, la testardezza e la germanofilia da papa Pius XI» (2). Quest ha dentant cumprovà, en ils davos onns da sia vita, ch'el enlegeva tuttina fitg bain l'essenza dal totalitarissem che regeva en l'Europa.

L'idolatria da la razza

Gia 1928 ha papa Ratti condemnà l'antisemitism. En schaner 1933 è Adolf Hitler (1889–1945) vegnì chancelier da Germania. En fanadur ha il papa, tenor sia disa politica, suuttascrit in concordat cun il reschim nov per dar ina fundamenta giuridica a la posiziun da la baselgia catolica en fatscha al stadi. Dentant èsi vegnì svelt cler che Berlin fascheva il pussaivel per summinar il patg cun il Vatican. Chiron rapporta manidlamaian davart la polemica schunada da la propaganda uffiziala tudestga per «Der Mythos des 20. Jahrhun-

dert» d'Alfred Rosenberg (1893–1946), in cudesch che denigrava il cristianism en num da rassissem e pajanissem. L'autur manegiava che «la Germania duaja sa purifitgar dal giudassem, dentant era dal catolicissem 'giudaic, sirian ed alpin' [sic! G. S.-C.] (...). Trais mais suenter la suutascriziun dal concordat resguardava cardinal Pacelli ['emprim minister' dal papa, lura ses successor sco Pius XII, G. S.-C.] sco 'insupportabel', en in memorandum tramezz a Berlin, ch'il studi da 'Der Mythos des 20. Jahrhunderts' vegnia prescrit als instituts pedagogics (...). En il chalender 1934 da la 'Front da la lavur' (4 millions exemplars) stava il citat suuandant da Rosenberg en posiziun bain vesaivla: 'La Bibbia e la baselgia romana han giudaïsma nostra olma' (...). Ils 24 da schaner 1934 ha Hitler nominà Rosenberg 'delegà dal schef per controllar l'entira fumaziun ed educaziun spiertala e culturala da la partida [unica]' (...). Il reschim na leva betg be controllar la baselgia, mabain era sfurzar tras ina concepziun religiosa e filosofica nova dal mund» (pp. 309–310).

«Mit brennender Sorge»

En avust 1936 han ils uestsgs tudestgs sa rimnads a Fulda. «En ina brev collectiva hani supplitgà Pius XI d'intervegnir pubblicamain cun in'enciclica che (...) descrivia uschè cler sco pussaivel quai che fa mal a la cardientscha en Germania – l'ateissem, las restricziuns da la libertad religiosa, las smanatschas encunter l'educaziun, las intrigas encunter las religiuns; las admoniziuns d'in tal text duessan dar scleriment schizunt als tschorvs e dasdar il durmigliuns (...). Ils 21 decembre 1936, sin cumond da Pius XI, ha cardinal Pacelli convocà a Roma tschintg prelats tudestgs per discutiar la situaziun da la baselgia en lur pajais e sa cunvegnir davart las decisius basignavilas (...). Ils 16 da schaner als ha Pacelli retschavids tutts tschintg» (pp. 363–364). Ils 17 èn ils prelats ids tar il papa che stava anc en letg suenter ina greva malsogna. Tuts han sa cunvegnids ch'ins duaja scriver e publitgar in'enciclica per tudestg. Pacelli ha incumbensà cardinal Michael von Faulhaber (1869–1952), archuvestg da Minca e Freising, cun la redacziun d'in sboz. «Ils manuscrits a disposiziun han demussà che Pacelli aveva revedi il sboz cun premura e complettà tscherts punts (...).

Il text da Faulhaber entschaveva cun ils pleuds 'Mit großer Sorge'; il text definitiv accentuescha (...): 'Mit brennender Sorge' (...). L'enciclica cuntegna in lung toc davart 'ils stgazis da scleriment' dal Veder Testament ed 'il pievel tscherni [da Dieu] che porta la revelaziun e l'empermischun' (p. 365). Il papa ha suuttascrit il document i 14 da mars. Malgrà lezzas admoniziuns han ils uestsgs austriacs, tschorventads dal discurs da Hitler ils 15 da mars 1938 sin il Heldenplatz da Vienna, appellà a vuschar per l'annexiun da lur pajais a Germania. Cardinal Theodor Innitzer (1875–1955), archuvestg da Vienna, ha sa disà da concluder sias decleraziuns en scrit cun «Heil Hitler!». Sin quai l'ha il papa convocà al Vatican; Innitzer ha stù precisar publicamain ch'ils catolics austriacs na sajan tuttina betg obligads da vuschar per l'annexiun.

Mussolini fa suenter a Hitler

Ma 1938, il davos onn da vita da Pius XI, l'ha manà quitads novs en sia patria taliana. 1929 aveva manà il reglament dal status giuridic e territorial dal Vatican. Il patg statal da Laterano ha creà il stadi da la Citad dal Vatican, il pli pitschen dal mund (0,44 km²). Papa Ratti l'ha organisà e po valair sco ses fundatur. A medem temp han ses secretari da stadi ed il «duce» Benito Mussolini (1883–1945) suuttascrit in concordat che ha sa palesà svelt sco problematic pervi da la pussanza crescenta dal stadi faschist. 1931 ha l'enciclica «Non abbiamo bisogno» crititgà la «vera e propria statolatria pagana» (citata p. 246) sco ideal dal reschim. Ma igl è vegni anc mender. «Davent da 1937 en l'Italia faschista han ins sviluppà ina doctrina da la razza che fin lura era restada per gronda part estra al pajais. Lezza giada ha il docent universitar Giulio Cogni publitgà 'Il Razzismo', in cudesch nua ch'el declerava ils principi dal rassism sco german e pruvava d'als adattar a l'Italia (...). Ina decleraziun solenna da la baselgia davart il rassism (13 d'avrigl 1938) è vegnida publitgada ils 3 da matg, apostà quel di che Hitler è arrivà a Roma en visita uffiziala» (pp. 379–381). Ils 30 d'avrigl ha Pius XI bandunà il Vatican per sia residenza da stad a Castel Gandolfo; «el ha scumandà al nunzi ed al clerus da frequentar las recepziuns ufizialas en onur da Hitler ed ha fatg servar ils museums dal Vatican per ch'ils commembers da la delegaziun tudestga na possian betg als visitar» (pp. 383–384).

Noss babun Abraham

A medem temp ha il papa scuvert «Interracial Justice», in cudesch dal pader american John LaFarge SI († 1963) encunter il rassism. Il papa ha convocà l'autur a Castel Gandolfo e l'ha incumbensà da sbozzar in'enciclica davart «l'unitad da la spezia umana, (...) e quai uschè dascus sco pussaivel. Pader Ledochowski, superiur dals gesuits, (...) ha acceptà che LaFarge l'avuria vid il project a Paris empè da Roma e l'ha dà auters dus gesuits sco collavoraturs (...). Gustav Gundlach, in da lezs, aveva edi l'artigel 'Antisemitismus' en il renumà 'Lexikon für Theologie und Kirche' e crititgà, en il Radio Vatican, il sostegn dals uestsgs austriacs a l'annexiun a la Germania (p. 385) (...). Entant, ils 14 da fanadur, ha in ministri talian fatg publitgar in manifest rassist. Ils 6 da settember ha il papa retschavì ina gruppa da l'Uniun catolica beltga da radio, «guidada da ses parsura Picard. Quest, sin giavisch expressiv da Pius XI, ha publitgà silsuenter in rapport davart la sentupada, en 'La Croix', 'La Documentation catholique' e 'La Libre Belgique'. Picard rapporta ch'el saja stà retschavì l'emprim cun auters dus spirituels e ch'i hajan regalà in missal al papa; immediat ha quest lura retschavì tschels pelegrins. Sfegliand il missal, ha Pius XI sa fermà tar in'uraziun dal canon: (...)

sacrificium patriarchae nostri Abrahæ (...). Dat adatg! Abraham è numnà noss patriarc, noss babun. L'antisemitism n'è betg cumpatibel cun il patratg e l'expressiun uschè sublims da quest text (...). Lura, rapporta Picard, na saveva il papa betg pli retegnair sia emozion. Cun vusch commovida hal'cità las frasas da Paulus che relevan nossa derivanza spirituala d'Abraham, concludend: 'Na, cristians na san betg aderir a l'antisemitism... Spiertalmain essan nus semits' (3).

La religiun da la naziun

Immediat suenter il pogrom nazi dals 9 ed 10 da novembre, l'uschedita «Reichskristallnacht», han quatter cardinals europeans, mintgin da sia vart, publitgà decleraziuns encunter il rassism; quel da Lisboa per exempl, patriarc Manuel Gonçalves Cerejeira (1888–1977), ha punctuà ch'i sa tractia d'ina religiun substitutiva: «Lez ideal nov sa numna sez religius. Ma questa religiun vul dir la mort dal cristianism; igl è la religiun da la naziun (...) che pretenda che Dieu sa mussia tras la razza, en la schientihscha da quels che la mainans» (cità da Chiron, p. 391). Dentant è l'enciclica davart l'unitad da la spezia umana restada in project. LaFarge ha consegnà ses sboz a Ledochowski che ha spertgà mais avant ch'el surdar a Pius XI. Quest n'ha betg pli savì elavurar l'enciclica avant sia mort ils 10 da favr 1939. Ha Ledochowski sabotà apostila project? En mintga cas aveva papa Pacelli autres prioritads che ses antecessor; el ha miss il sboz en in truchet. Ins ha stù spertgà fin 1958 per che Gion XXIII (Angelo Giuseppe Roncalli, 1881–1963) sappia «spalancar las fanestras» da la baselgia catolica e midar la tenuta da questa areguard il giudassem. Vair resta il necrolog da papa Ratti tras Julien Weil, rabin suprem da Paris: «El è stà in grond servitur da Dieu, in vair apostol da gistica sociala, da pasch e fraternitad tranter ils umans» (cità p. 395).

1) Yves Chiron, Pie XI. Paris (Perrin, ISBN 2-262-01846-4) 2004.

2) Cità en: Paul Sérent, Les grands déchirements des catholiques français 1870-1988. Paris (Perrin, ISBN 2-262-00625-3) 1989, p. 112.

3) Rosetta Loy, La parola ebrea. Segunda ediziun. Turin (Einaudi, ISBN 88-06-15973-9) 2003, pp. 40–41.